

“LO BROTA RIU DI AWA KU TA DUNA BIDA”

*“Manera Skritura ta bisa: ‘Esun ku kere den Mi,
riu di awa ku ta duna bida, lo brota for di profundidat di su ser’ ”*
(Huan 7:38).

Tur aña, miónes di turista i peregrino ta bishitá Laman Morto. Skritura ta yam'é Laman Salu, Laman di Arabia òf Laman Oriental. Probablemente esnan ku pa promé biaha a yam'é “Morto” tabata e griegonan den siglo 2 p. K. I nan tabatin rason: su konsentrashon haltu di salu ta stroba tur tipo di bida marino den dje. Anto si no ta poko, e laman akí no ta hiba su awanan niun kaminda; e ta risibí so, pero no ta duna. Mas morto ku esei e no por ta.

Mes morto tambe ta spiritualidat di esun ku no ta biba pa duna, esun ku ta retené den su paden tur bendishon ku kada dia Señor ta dun'é. Fe ta morto si no transform'é den un kanal di bendishon, den un esfera di influensia ku ta hiba awa ku ta duna bida.

Kisas bo ta sinti bo spiritualmente morto? Kisas bo ta ripará ku bo bida spiritual no ta asina produktivo i ta sin bida meskos ku Laman Morto? Hesus ta duna e promesa maravioso akí: “Esun ku tin set, mester bin bebe serka Mi. Manera Skritura ta bisa: “Esun ku kere den Mi, riu di awa ku ta duna bida, lo brota for di profundidat di su ser” (Huan 7:37, 38).

Bo tin set? Bini serka Señor ku fe i eksperensia bida na abundansia ku tin den djE. E eksperensia ei lo kambia bo di paden, pone bo sinti bibu i kombertí bo den un sorto di riu ku ta brota dunando bida na otronan. Bida no ta den bo, e ta den Dios, ku ta obra pa medio di un karakter transformá den generosidat di kurason i palabranan ku ta sana.

Segun profeta Ezekiel, e situashon di Laman Morto lo kambia ora e riu ku ta duna bida sali for di Dios su presensia drenta den su awanan: “E awa akí ta kore bai parti ost di e pais i for di ei e ta pasa dor di vaye di Yordan bai Laman Morto. E koriente di awa ta purifiká awa di e laman ei. Tur kaminda ku e riu pasa e ta trese bida, ta yen di bestia einan. E laman ta yen di piská, pasobra e riu ku ta sali den dje, ta hasi e awa salú” (Ezekiel 47:8, 9). Den e pasashi akí, e profeta ta komparando Laman Morto ku un bida spiritual morto; sin embargo, e awa bibu i kristalino ku ta sali di Dios por sana nos mortalidat spiritual i kombertí nos den kreyentenan yen di bida, si solamente nos kere den djE, manera Skritura ta bisa.